



Matumuuna siunnersuutigaara Naalackersuisut peqquneqassasut Danskit Naalackersuisuinut saaffigineqqullugit Kangaatsiami piaartumik politeqarfeqalernissaanik noqqaassuteqaqqullugit.

(Inatsisartunut ilaasortaq Hans Aronsen, Inuit Ataqtigiit)

(Siullermeerneqarnera)

Inuit Ataqtigiinnut ilaasortaq, Hans Aronsen siunnersuummut inuiaqtigiit politiinniit saqqumilaarneq kiffartuunneqartarneranullu, pingaarutilimmut siunnersuuteqarneranut demokraatiniit qujavugut.

Siunnersuuteqartup tunngavilersuutai paasilluarlutigit taamatullu Naalackersuisut nikinginneranni suliniuteqarsimanerat maanna nanginneqartussatut Inatsisartunut suliassanngortinneqarneranut soorunami apeqqutinik pinngorartitsivoq.

Sapaatip akunnera siuliani maani inersuarmi oqaluuserisatsinnut qulequttaat allat pineranni kommunefogedinut attuumassuteqartut kalluallatsiarpagut. Tassanilu Naalackersuisup oqariartuutigivaa aaqqiissutaasinnaasunut ujartuiniarluni. Taamaattumik tamanna neriulluarfigaarput, tassami nuna tamakkerlugu kommunefogdenik sulisussarsiortarneq unammillernartuummat, oqartussaaffiullu justitministeriaqarfimmiittup akisussaaffimminik naammassinnissinnaanera killeqarnarsorinartarmat. Taava qulequtaq tikitassarput unaasoq, Kangaatsiami politeeqarfimmik pilersitsinissaq politiitut ilinniarsimasumik ataatsimik, allaffissortumik ataatsimik, biilnik snescooterinillu pisariaqartitsisoqassasoq oqariartuutigineqarpoq. Kangaatsiap inuttussusaa eqqarsaatigalugu apeqqutigineqarluarsinnaavoq sooruna Qasigianguit, Ittoqqortoormiit Qeqertarsuarlu assigalugit politeeqarfiunnginnera. Taamatullu illoqarfittut mikinerusunut qiviassagutta takusinnaavagut nassuerutigillugulu Paamiut, Narsaq, Nanortalik, Upernavik il.il. nunatta avataaniit tikisitaanerusunik politeeqarfiit sulisoqarput, sulilu avataaniit tikisitanik suliartortussanik pissarsiortoqartuarluni, sulisunik attassisinnaanginnerup kingunerisaanik. Saniatigut ukiorpassuarni politiini sulisuusimasut politiitut suliunnaarsimapput, ilaatigut suliffimmi atukkatigut artorsarsimanermi kingunerisaanik. Taava Kangaatsiaq politiimik ilinniarsimasumik sulisoqalissagaluaruni taava sulisutut atugassarititaasut minnerpaamik apeqqusertariaqarput, ilami sumiiffiini amerlasuuni politeeqarfiusuni politiit kisimiillutik sulisarnissaat qimakkiaartuarneqarmat, tamannalu sulisorisanik illersuinermik tunngaveqarpoq. Taassumap saniatigut apeqqutigineqartariaqarpoq sulisussarsiornikkut unammillernartutigit suli annertunerusumik politeeqarfiup sulisussarsiornissaminut sulisunillu attassinissaminut ajornartorsiuteqalernerunissaanut ilimanaateqarsinnaammat. Taamaattumik piviusorsiortumik aaqqiissuteqassaguni ilaatigut kommunefogde-nut aaqqiissutissat tikkineqarsinnaapput.

Pinerluuteqartarneq eqqarsaatigissagaanni, apeqqutaasorinangilaq pinerluuteqartartut ikinnerunerat akissuteqaatini tunngavilersuutigineqarnera, ilami pinaveersaartitsineq aningaasanik naleqarmat minnerunngitsumillu politiiniit illoqarfimmi/nunaqarfimmi saqqumilaarneq imminermini aamma toqqissisimanartumik pinaveersaartitseqataasinnaasumillu kinguneqarsinnaammat. Siunnersuut



itigartivinnagu apeqqutit soqutiginaateqarsinnaasut pinerullugit ataatsimiititaliamut ingerlateqqinnissaa innersuussutigaarput, tassanilu qaqqineqartariaqarput qulaani taakkartukkanni siunissami politiinik sulisussarsiornermi unammillernareeqisut qanoq suli unammillernartutut inissisiinnaanera. Ukiumut politiitut ilinniarsimallutik naammassisartut pisariaqartinneqartunut saniliutissagaanni tamanna suli naammangilaq. Kommunefogdenillu pisariaqartitsineq ugartorneqartariaqarpoq, qulaajaaffigineqarlunilu atukkatigut suut pitsanngorsaataasariaqarnerisut massakkut siunissamilu nuna tamakkerlugu pisariaqartitsinerput ersarissarneqartariaqassalluni. Taamaaliornikkut politiinik avataanit tikisitanik annikillisaasinnaaneq tikkineqarsinnaanera siunertarluguttaaq innuttaasut nunat immikkoortuani politeeqarfeqarnikkut suleqataasinnaanerat peqataatinneqarnerunissaat ugartortariaqavissutut isumaqarfigigatsigit, malitsianillu oqimaaqqatigiinnerusumik naapertuuttumillu aaqqiissuteqarluta. Tamattami siunertaq tamanna pingaaruteqaqisoq, anguniagarisariaqarparput. Naalakkersuisut apererusunnarput naqissusersinnaaneraat eqqortuunersoq politeeqarfeqarnermi nunatsinni qimanneqarsimanersoq politiimik ataatsimik inuttaqartitsineq, sulisut atukkatigut ilaatigut illersorninarlugit aaliangiisimanermi. Taamaasimassappat siunnersuutimi tikkineqartut sulisoqarniarnerup qanoq aqqinneqarsinnaanera sunnerneqartussaammat, taamaalilluni ersarissumik paasisariaqarparput isummerfissaq qanorpiq imaqarnerisut.

Taamatut oqaaseqarluta ataatsimiititaliaq sulilluarnissaannik kissaapparput, neriullutalu Naalakkersuisoq qanimut suleqatigilluarlugu qulaajagassat pisariaqartut, aaliangiinissarput sioqqullugu, Inatsisartunut saqqummiunneqarumaartut.